

■ GRISCHUN

Nova presidenta tar la Fundaziun per la fotografia

(cdm/fmr) *Corina Casanova* è vegnida elegida dal cussegl da fundaziun sco nova presidenta da la Fundaziun grischuna per la fotografia. Ella suonda a *Bernard Cathomas* ch'è stà commember dapi l'entschatta da la fundaziun il 2013. Ils davos trais onns è el stà president, ed ha ussa abditgà cun 75 onns per motivs da vegliadetgna. Quai scriva la fundaziun en ina comunicaziun a las medias.

La presidenta ed il cussegl procuran per il rom instituzional e finzial da la Fundaziun per la fotografia e decidan las directivas per sia lavur che vegn alura exequida en emprima lingua dal mainagestun *Pascal Werner*. Ils ulteriurs commembers dal cussegl da fundaziun èn *Barbara Janom Steiner* sco vicepresidenta, *Ursina Jecklin*, *Sebastian Kirsch*, *Johannes Meyer* e *Chasper Pult*. En il cussegl consultativ s'engaschan la fotografa *Lucia Degonda* e *Georg Jäger*, anteriur manader da l'institut per la perscrutaziun da la cultura grischuna, e da nov er *Madleina Deplazes* ch'è collavuratura scientifica en la Fundaziun svizra per la fotografia.

Finanziada vegn la lavur cun meds per mandats da prestaziun dal chantun e da la citad da Cuir, cun contribuziuns da differentas vischnancas, da Memoriav (l'associaziun per il mantegniment da la



Corina Casanova è la nova presidenta da la Fundaziun grischuna per la fotografia.

FOTO FMR/DANIELA DERUNGS

memoria audiovisuala da la Svizra), da firmas ed organisaziuns privatas sco er da donaturas e donaturs. A Cuir visavi la Chasa grischa ha la fundaziun ses locals da lavur, nua ch'i vegnan era exponids documents or da l'archiv.

Dapi sia existenza ha la fundaziun digitalisà numerus relaschs ed ordinà divers archivs publics da fotografias. En la banca da datas online (www.fotoGR.ch) sa chattan oz radund 50 000 maletgs cataloghisads. Corina Casanova surpiglia il presidi a partir da l'entschatta fanadur da quest onn.